

DOMENIE II DOPO DE NATIVITÂT

Antifone di jentrade Sap 18,14-15

Biel che un cidinôr cuiet al invuluçave dutis lis robis
e la gnot e jere a mieç dal so cors,
il to Verbo onipotent, Signôr,
al è vignût jù dal cîl, des sentis reâls.

Si dîs Glorie a Diu.

Colete

Diu onipotent e eterni, lûs di chei che a crodin,
jemple de tô glorie il mont intîr
e panditi a ducj i popui tal sflandôr de tô veretât.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spiritu Sant,
par ducj i secui dai secui.

PRIME LETURE Sir 24,1-4.8-12

La sapience di Diu e je vignude a stâ intal popul elet.

Dal libri dal Fi di Sirac
La sapience e laude sè stesse
e si vante tal mieç dal so popul.
E vierç la bocje te semblee dal Altissim
e si vante denant de cort dal cîl:
«Jo o soi saltade fûr de bocje dal Altissim,
e tant che un nûl o ài cuvierzude la tiere.
O ài stât a stâ là sù adalt tal cîl,
o vevi la sente tune colone di nûi.
Alore chel che al à créât dut mi à dât un ordin,
il gno creadôr mi à dât un sít par polsâ
e mi à dit: Met la tende in Jacop,
cjol come ereditât Israel.
Lui mi à creade tal imprin, prime dal temp,
e no sparissarai par dute l'eternitât.
O ài funzionât denant di lui, te tende sacre,
cuant che mi soi sistemade in Sion.
Te citât che lui al ame mi à fate fermâ,
cumò la mêm paronance e je in Jerusalem.
O ài metudis lidris tun popul gloriôs,
o ài vude la legitime tal toc dal Signôr».
Peraule di Diu.

SALM RESPONSORIÂL dal Salm 147

R. Il Verbo si è fat cjar
e al è vignût a stâ framieç di nô.
o ben:
R. Aleluia, aleluia, aleluia.

Jerusalem, dai glorie al Signôr,
Sion, laude il to Diu;
parcè che al à rinfuarçâts i clostris des tôs puartis,

al à benedît i tiei fîs dentri vie. **R.**

Tai tiei confins lui al à metude pâs,
cu la flôr dal forment ti sostente.
Al mande su la tiere i siei ordins,
e cor biel svelte la sô peraule. **R.**

I conte a Jacop la sô peraule,
a Israel i siei decrets e lis sôs sentencis.
Chest no lu à fat cun nissun altri popul,
a nissun di lôr no ur à pandûts i siei judizis. **R.**

SECONDE LETURE Ef 1,3-6.15-18

Diu nus à predestinâts a jessi siei fîs di anime.

De letare di san Pauli apuestul ai Efesins

Benedet Diu e Pari dal Signôr nestri Jesù Crist,

che tai cîi nus à colmâts

di ogni sorte di benedizion spirituâl in Crist.

Nus à sielzûts in lui prin de creazion dal mont,

par che o fossin sants e cence magle denant di lui tal amôr.

Lui nus à predestinâts a jessi siei fîs di anime,

midiant di Jesù Crist,

seont il disen plen di boncûr de sô volontât,

a laude dal sflandôr de sô gracie

che nus à gratificâts tal so Fi plui cjâr.

Par chel ancje jo, che o ài sintût a fevelâ de vuestre fede tal Signôr Jesù e dal vuestri bonvolê par ducj i sants, no fermi di ringraciâ par vualtris, ricuardantjus tes mês preieris, par che il Diu dal Signôr nestri Jesù Crist, il Pari de glorie, us dedi un spirt di sapience e di rivelazion par cognossilu miei. Che al ilumini i vòi de vuestre inteligence par che o podêts rivâ a capî cuale che e je la sperance de sô clamade, cuale che e je la ricjece de sô ereditât gloriose framieç dai sants. Peraule di Diu.

CJANT AL VANZELI cf. 1 Tm 3,16

R. Aleluia, aleluia.

Glorie a ti, o Crist, predicjât a ducj i popui;

glorie a ti, o Crist, crodût intal mont.

R. Aleluia.

VANZELI Zn 1,1-18 *

Il Verbo si è fat cjar e al è vignût a stâ framieç di nô.

Dal vanzeli seont Zuan

Tal imprim al jere il Verbo

e il Verbo al jere daprûf di Diu

e Diu al jere il Verbo.

Lui al jere tal imprim daprûf di Diu.

Dut al è stât fat midiant di lui

e cence di lui nol è stât fat

propit nuie di ce che al è stât fat.

In lui e jere la vite

e la vite e jere la lûs dai oms;

e la lûs e fâs lûs tal scûr

ma il scûr nol à rivât a cjapâle.

Al fo un om mandât di Diu,

il so non al jere Zuan.
Lui al vignì come testemoni
par fâi di testemoni a la lûs,
par che ducj a crodessim midiant di lui.
Nol jere lui la lûs,
ma par fâi di testemoni a la lûs.
E jere la lûs vere,
che i fâs lûs a ogni om,
chê che e vignive tal mont.
Al jere tal mont
e il mont al è stât fat midiant di lui
e il mont no lu à ricognossût.
Al è vignût in cjase sô
e i siei no lu àn acetât.
Però a di chei che lu àn acetât
ur à dât il podê di deventâ fîs di Diu,
a di chei che a crodin tal so non,
che no par vie di sanc
ni par volontât di cjar
ni par volontât di om
ma di Diu a son stâts gjenerâts.
E il Verbo si è fat cjar
e al è vignût a stâ framieç di nô
e nô o vin viodude la sô glorie,
glorie come di unigjenit dal Pari
plen di gracie e di veretât.
Zuan al fâs di testemoni par lui
e al proclame: «Chel chi al jere chel che o disevi:
Chel che al ven dopo di me
al è passât denant di me
parcè che al jere prin di me».
Di fat de sô plenece
ducj nô o vin cjapât
e gracie sore gracie;
parcè che la leç e je stade dade midiant di Mosè,
e la gracie e la veretât
a son deventadis realtât midiant di Jesù Crist.
Diu nissun no lu à mai viodût.
L'Unigjenit Diu,
che al è tal grim dal Pari,
propit lui nus al à pandût.
Peraule dal Signôr.

Si dîs O crôt.

Su lis ufiertis

Santifice chescj regâi, Signôr,
cu la nativitat dal to Unigjenit,
che nus mostre la strade de veretât e nus sigure la vite eterne.
Par Crist nestri Signôr.

Antifone a la comunion cf. Zn 1,12

A ducj chei che lu àn acetât,
il Verbo deventât cjar
ur à dât il podê di deventâ fîs di Diu.

Daspò de comunion

Signôr, nestri Diu, ti preìn cun grande umiltât:
midiant de virtût di chest misteri,
smondeinus de nestre tristerie
e colme lis nestris bramis plui santis.
Par Crist nestri Signôr.